

Sol nu der ein Sacramentirer sein, welcher die gantze newertichte communicationem physicam vnd realem nicht billichen wil, so mus Wigando auch Herr Lutherus ein Sacramentirer vnd alle alte Lerer der Kirchen Sacramentirisch gewesen sein. Denn die Communicatio Idiomatum, welche den alten Lerern vnd Herrn Luthero bekandt gewesen, hat diese art, das sie ist τρόπος ἀντιδόσεως et iuxta phrasin scripturae mutua com-[121r:]municatio, das ist, das der Person Christi beider Naturn eigenschafft werden in heiliger Schrift ausdrücklich zugelegt also, das dem Menschen Christo die Göttlichen vnd herwiderumb dem Son Gottes die Menschlichen eigenschafften zugeschrieben werden. Vnd solches geschicht in concreto mit einem solchen namen, dadurch die gantze Person bedeutet wird.

Widerwertigkeit
der lere von der
Communicatione
Idiomatum bey den
alten Lerern vnd
den newen Flacianischen
Scribenten.
1, 2.

So man auch solche Reden erkleren sol, leren die Alten, das man dazu particulam distinctiuam brauchen müsse, daraus verstanden werde, nach welcher Natur eine jede eigenschafft, so der gantzen Person in heiliger Schrift ausdrücklich zugelegt wird, von Christo geredt sey. Denn was der Person recht in solchen reden Göttliches Worts zugeschrieben wird, mus darumb nicht beiden Naturn zugleich, einer sowol als der andern, in vnd für sich selbst eigen sein oder werden. Darumb auch die Reden in abstracto, das ist, da man der einen Natur eigenschafft der ander für sich vnd als die jrige geben wil, nicht geduldet noch verstatet werden.

3. Solche der Alten Lere hat beides wider Nestorij vnd Eutychis ketzerey, das ist wider die trennung der einigen Person Christi vnd wider die vermischung oder vermengung der vnterschiedenen Naturn in Christo, jren rechten, nöti-gen, Christlichen nutz vnd brauch gehabt.
4. Es ist auch von der rechtgleubigen Kirchen diese Lere von denen Reden gebraucht vnd darauff allein referirt vnd gezogen worden, die da von den eigenschafften der Naturn in Christo reden. Was aber das Ampt Christi, sein Reich vnd Priesterthum belangt, haben die alten Lerer nicht auff die Communicationem Idiomatum gezogen, sintemal nicht einer Natur eigen ist, was zur beschreibung des Ampts Christi gehöret, weil eben dar-[121v:]umb, auff das Christus vnser Erlöser, Hoherpriester, Kōnig vnd Heubt seiner Kirchen sein möchte, der heimliche Ratbeschlus Gottes von der persönlichen vereinigung beider Naturn in dem Mittler Christo geschehen ist.
5. Es haben auch die Alten in der Lere von der Communicatione Idiomatum vnterschieden die wesentlichen eigenschafften einer jeden Natur in Christo, die da vnuerrückt sampt dem wesen vnd substantz der Naturn selbst, in ewigkeit vnzertrenlich vnd vnzerstörlich erhalten werden, von den gaben, hoheiten, fürzug, ehre vnd herrligkeit, so der Menschlichen Natur Christi auch für vnd in sich selbst nach der verklerunge für allen andern Creaturen, Engeln vnd Menschen gegeben vnd widerfaren sein.

1. Diesen allen zu entgegen verteidiget Wigandus die Newertichte physicam oder realem communicationem, in welcher seinem fürgeben nach allein die Menschliche Natur von der Göttlichen in vnd für sich wesentlich empfangen